

茶香室叢鈔

清俞曲園著

第十編

進步書局校印

清德清俞樾著

金珠包子

宋王栐燕翼詒謀錄云。大中祥符八年。二月丁酉。值仁宗皇帝誕生之日。宰臣以下稱賀。宮中出包子。以賜臣下。其中皆金珠也。

蕎麵燒餅

蜀何光遠鑒戒錄云。天復初。車駕走幸石門。絕糧數日。左街沙門懷寶。進蕎麵燒餅奉宣賜紫。

子推燕子

宋孟元老東京夢華錄云。冬至後一百五日。為大寒食。前一日。謂之炊熟。用麵造棗餽飛燕。柳條串之。挿於門楣。謂之子推燕子。

果食將軍

宋孟元老東京夢華錄云。七月七夕。以油麵糖蜜。造為笑靨兒。謂之果食。花樣奇巧百端。若買一斤數內。有一對被介胄者。如門神之像。蓋自來風流。不知其從。謂之果

食將軍。

原酒之始

明李日華六硯齋三筆云。原酒之始。實本於桑。晉江統作酒誥曰。酒之所興。作自上皇。或云儀狄。一曰杜康。有飯不盡。委餘空桑。鬱積生味。久蓄氣芳。本出於此。不由奇方。朱翼中著北山酒經三卷曰。古語有之。空桑穢飯。醞以稷黍。以成醇醪。酒之始也。按藝文類聚食物部。引晉庾闡斷酒戒。亦云。空桑珍味。始於無情。靈和陶醞。奇液特生。

灑落泉

明李日華六硯齋二筆云。桐廬酒味清美。名灑落泉。乃嚴瀨水所釀。

按酒名甚佳。未見有用者。

茶之功效

宋程大昌演繁露續集云。盧仝謝惠茶詩。歷叙一盃至六盃。皆有功用。

按茶譜記。蒙山中項茶效曰。若獲四兩。服其一則祛疾。二即無病。三即換骨。四兩即為地仙。然則謂茶能輕身可為飛仙。唐世通有其傳。非全出意。自為怪奇也。

茶之別種

明陳繼儒茶董補云。茶之別者。有枳殼芽。枸杞芽。枇杷芽。皆治風疾。又有阜萸芽。槐芽。柳芽。乃上春摘其芽。和茶作之。故今南人輸官茶。往往襍以眾葉。惟茅蘆竹箬之類。不可入。自餘山中草木芽葉。皆可和合。椿柿尤奇。

按此則今茶肆中所市茶。大率非真茶矣。

茶綱

宋姚寬西溪叢語云。茶有十綱。第一。第二。大嫩。第三綱。最妙。第一。名曰試新。第二。名曰貢新。第三。名有十六色。龍園勝雪。白茶。萬壽龍芽。御苑玉芽。上林第一。乙夜供清。二字龍鳳英華。玉除清賞。承平雅玩。啟沃承恩。雪葉雪英。蜀葵金錢。玉華千金。第四。有十二色。無比壽芽。宜年寶玉。玉清慶雲。無疆壽龍。萬春銀葉。玉葉長春。瑞雪翔龍。長壽玉圭。香口。焙興國巖。上品揀芽。新收揀芽。第五。有十二色。太平嘉瑞。龍苑報春。南山應瑞。興國巖小龍。又小鳳續入額。御苑玉芽。萬壽龍芽。無比專芽。瑞雪翔龍。先春。太平嘉瑞。長壽玉圭。已下五綱。皆大小團也。

按宋時茶。有此諸名。人罕知之。然如萬壽龍芽。御苑玉芽。無比壽芽。瑞雪祥龍。長

壽玉圭皆重見何也

雀舌非茶之上品

宋沈括夢溪筆談云。茶芽古人謂之雀舌麥顆。言其至嫩也。今茶之美者。其質素良而所植之土又美。則新芽一發。便長寸許。其細如針。如雀舌麥顆者。極下材耳。予有詩云。誰把嫩香名雀舌。定來北客未曾嘗。不知靈草天然異。一夜風吹一寸長。

闌林茶蔊菜

國朝劉獻廷廣陽筆記云。衡山水月林主僧靜音餽余闌林茶一包。蔊菜一瓶。闌則安切。音鑽平聲。衡人俗字也。此茶出石罅中。乃鳥銜茶子墮罅中而生者。極不易得。蔊土音坎字。書音罕。曰其味辛。與黃豆同煮。以器罨之。而沃之以臘醋。久之辣極。與京師辣菜味同。

按余親家彭雪琴尚書。曾餽余衡山茶。極佳。未知是闌林茶否。

女兒茶

明李日華紫桃軒雜綴云。泰山無茶茗。山中人摘青桐芽點飲。號女兒茶。

穆院樹葉

明季日華六硯齋三筆云。昔有客過茅君。時當大暑。茅君於手中中解茶葉。人與一片。客食之。五內清涼。茅君曰。此蓬萊山穆陀樹葉。衆仙食之以當飲。

碧蘿春

國朝王應奎柳南隨筆云。洞庭東山碧蘿峯石壁產野茶。每歲土人持竹筐採歸。未見其異也。康熙某年。按候以採。而其葉較多。筐不勝載。因置懷閒。茶得熱氣。異香忽發。採者爭呼嚇殺人香。嚇殺人吳中方言也。因遂以名是茶。自是每採茶。土人男女長幼必沐浴更衣。盡室而往。盛不以筐。悉置懷閒。而土人朱元正。獨精製法。出自其家。尤稱妙品。每斤價值三兩。己卯。車駕幸太湖。以其名不雅。題之曰碧蘿春。地方大吏。歲必採辦。而售者以偽亂真。元正沒。製法不傳。即真者亦不及曩時矣。

按碧蘿春初名嚇殺人。至今人多知之。然其始得名。自康熙間。且必盛置懷閒。乃發其香。而朱元正。尤為製茶名手。則人固不盡知也。余居吳下。每歲必有餽此茶者。故喜得其詳而識之。

按國朝王維德著林屋民風。於太湖事甚詳。而土產類。但言茶出洞庭包山者。名副目。俗多細茶。出東山者。品最上。名片茶云云。其書作於康熙癸巳。乃康熙二

十年猶未知有碧蘿峯之茶也。碧蘿峯之名不在七十二峯之數然則此茶未出
並此峯亦不顯也。

茶食

宋洪皓松漠紀聞云。金國舊俗。婚納幣皆先期拜門。戚屬偕行。男女異行而坐。先以
烏金銀盃酌酒飲三行。進大軟脂。小軟脂。蜜糕。人一盤。曰茶食。

按此則茶食之名亦古矣。

又按大軟脂。小軟脂。下有注云。如中國寒具。蜜糕下有注云。以松實胡桃肉。清蜜
和糯米為之。形或方或圓。或為柿蒂花。大略類浙中寶階糕。

按此物今蘇杭皆有之。正謂之蜜糕。而寶階糕之名。則無聞。

糖霜

宋王灼糖霜譜云。糖霜一名糖冰。福唐四明番禺廣漢遂甯有之。獨遂甯為冠。先是
唐大曆間。有僧號鄒和尚。不知所從來。跨白驥。登緘山。結茅以居。須鹽米薪菜之屬。
即書紙繫錢。遣驢負至市區。人知為鄒也。取平直挂物於鞍。縱歸。一日。驢犯山下黃
氏蔗齒。齒請償。鄒曰。汝未知審。蔗糖為霜。利當十倍。試之果信。自是流傳其法。鄒末

年。棄而北走。其徒追蹕之。但見文殊石像。始知大士化身。白驥者。獅子也。宋陸游老學庵筆記云。聞人茂德言。沙糖中國本無之。唐太宗時。外國貢至。問其使人此何物。云以甘蔗汁煎用其法煎成與外國者等。自此中國方有沙糖。唐以前書傳。凡言糖者。皆糲耳。如糖蟹。糖薑。皆是。

按此事。見唐書西域摩揭陀傳云。貞觀二十一年。始遣使者。自通於天子。太宗遣使取熬糖法。即詔揚州上諸蔗作瀋。如其制。色味迥西域遠甚。然則不始於大歷。聞矣。

又按三國吳志孫亮傳。注引江表傳曰。亮使黃門以銀椀并蓋。就中藏吏。取交州所獻甘蔗錫。則三國時已有之。并不始於唐也。

糖霜譜又云。自古食蔗者。始為蔗漿。宋玉招魂所謂肺齧炮羔。有柘漿是也。其後為蔗錫。孫亮使黃門就中藏吏。取交州所獻甘蔗錫是也。其後又為石蜜。廣志云。蔗錫為石蜜。南中八郡志。笮甘蔗汁。曝成錫。謂之石蜜。本草亦云。煉糖和乳為石蜜是也。唐史載太宗遣使至摩揭陀國。取熬糖法。即詔揚州上諸蔗作瀋。如其制。色味愈西域遠甚。然糖瀋作劑似是今之沙糖。蔗之枝盡於此。不言作霜。然則糖霜非古也。

按此則王晦叔非不知有孫亮唐太宗事。但以為彼皆沙糖而非糖霜。其意以沙糖為餳也。

愚合諸說參之。楚辭柘漿為脯蠶炮羔之用。必非僅飲其汁也。疑後世蔗餳古已有之。但出南方蠻夷中。故楚人得有之。而至三國時。猶出於交州也。然但知為餳。未知為霜。糖霜之法。又出自西戎。唐史所載。老學庵筆記所說。皆實事也。鄒和尚亦必一番僧。故知其法。而以之告蜀人。蜀之為糖霜。或始自鄒耳。

本草綱目。飴糖入造釀類。曰飴餳。用麥蘖。或穀芽。同諸米熬煎而成。沙糖石蜜。並入果類。附甘蔗後。曰法出西城。唐太宗始遣人傳其法入中國。以蔗汁過樟木槽取而煎成。清者為蔗餳。凝結有沙者為沙糖。漆甕造成如石如霜如冰者為石蜜。為糖霜。為冰糖也。此則蔗餳與糖霜。但有精粗之別。合而一之。不復知其初之一出南蠻。一出西戎矣。

周官鹽人王之膳羞。其飴鹽。注云。飴鹽鹽之恬者。今戎鹽有焉。

按恬即甜字。鹽而甜。疑即糖霜。鄭康成以戎鹽當之。然則唐太宗所求之摩揭陀者。古或已入中國矣。

明嘉靖以前無白糖

國朝劉獻廷廣陽雜記云。嘉靖以前。世無白糖。閩人所熬。皆黑糖也。嘉靖中。一糖局。偶值屋瓦墮泥於漏斗中。視之。糖之在上者。色白如霜雪。味甘美。異於平日。中則黃糖。下則黑糖也。異之。遂取泥壓糖上百試。不爽。白糖自此始見於世。

明宮中七月喫鯆魚

明劉若愚宮史云。七月食鯆魚為盛會。賞荷花。鬪促織。

按此知明代京師亦有鯆魚。然在七月中。似非其候也。

砍膾書

明李日華紫桃軒雜錄云。苕上祝翁墨溪家傳。有唐人砍膾書一編。文極奇古。首篇製刀砧。次別鮮品。次列刀法。有小晃白。大晃白。舞梨花。柳葉縷。對翻蝶。千丈線等名。大都稱其運刀之勢。與所砍細薄之妙也。末有下豉醯及發沸之法。中云。翦香柔花葉為筆。取其殷紅翠碧。與銀絲相映。不獨爽喉。兼亦豔目。然竟不知香柔花為荷花也。

按香柔花。疑謂花之香而且柔者。非必花名。

森饭

國朝章有謨景船齋襍記云。先伯祖青蓮公台鼎嘗招陸古塘飲。名曰森飯。視之。則羹湯三而已。與皛飯毳飯並稱韵事。

平旦食粥

宋陸游老學庵筆記云。護聖楊老說平旦粥後就枕則粥在腹中。煖而宜睡。天下第一樂也。後讀李端叔詩。粥後復就枕。夢中還在家。則固有知之者矣。

按余於隨筆卷四引宋杜清獻公文集奏劄。言范鍾令臣粥後過堂議事。勉從其言。初八日粥後一往為宋時晨起啜粥之證。今讀此知晨起啜粥由來久矣。

凍米糕

明李日華六硯齋三筆云。余常於僧堂食半邇凍米糕於臘月。用白春白糯米置大缸中。注水結冰凍之。至春暖冰泮。取出磨粉炊糕。異常鬆美。

芭蕉脯

國朝王士禎香祖筆記云。偶閱安老懷幼方。載製芭蕉脯法。蕉根有兩種。一種黏者可食。取作手大片。灰汁煮熟去汁。再以清水煮易水。令灰味盡。取壓乾。乃以鹽醬蕪。

羹乾薑熟油胡椒等研浥一兩宿取出焙乾略搥令軟食之全類肥肉之味。

按芭蕉可作脯。世鮮知者。余家多芭蕉。行試為之。或亦一佳味也。其書又有製蓮子脯。牛蒡脯法。今不錄。

華山靈豆

宋張端義貴耳集云。華山陳搏有靈豆服一粒四十九日不飢筋力如故顏色若嬰兒。世罕得服之者。

黃屑二斗

明李日華六硯齋三筆云。陳後主沈后供智者大師物。有赤松澗米五石。黃屑二斗。黃屑不知何物。十道志以為沈香末。亦未確。隋煬帝為晉王時供智者物。有貓牛酥三瓶。又不知貓牛是何等牛。

宋錦

國朝諸人獲堅瓠集云。錦以宋織為上。泰興李先生家藏淳化閣帖十帙。每帙悉以宋錦裝其前後。錦之花紋二十種。各不相犯。先生歿後家中落。欲貨此帖。索價甚昂。一人以厚貲得之。取其錦二十片。貨於吳中機坊為樣。竟獲重利。其帖另裝他綺。復

售於人。此亦不過手之智也。今錦紋愈出愈奇。青出於藍而青於藍矣。

按此知國初吳中猶以織錦為業。今則無矣。宋錦花紋亦遂成廣陵散。

教子升天蟒衣

國朝章有謨景船齋襍記云。嘉靖甲子賜公謂徐文貞階也教子升天蟒衣一襲。係上手擇有珠者。

按宋玉杯有名教子升天者。亦見景船齋襍記。余已載於叢鈔二十矣。蟒衣亦有此名。未詳其製。

游魯望布袍

國朝朱彞尊靜志居詩話云。墨布袍者。宋成高進士。福建提刑德清游杖魯望所服。元初以遺老薦授福州總管。固辭不就。題袍背云。前宋遺民。今為百姓。雖雨晴寒暑。未嘗解脫。卒葬果山。

按墨布袍乃陳聲伯霆水南集中詩題。聲伯亦德清人也。因其為吾邑鄉賢。故錄之。今邑人尚有游姓者。當即其裔。

紙衣

宋蘇易簡文房四譜云。山居者常以紙為衣。蓋遵釋氏云。不衣蠶口衣也。然服甚煖。衣者不出十年。而黃氣促絕。嗜欲之慮。且不宜浴。蓋外風不入。而內氣不出也。亦嘗聞造紙衣法。每一百幅。用胡桃乳香各一兩。煮之不爾。蒸之亦妙。陰乾。用箭幹。橫卷而順處。然患其補綴繁碎。今夥縣中。有人造紙衣段。可如大門闌許。近士大夫征行。亦有衣之者。蓋利其拒風於陰沍之際焉。陶隱居亦云。武陵人作穀皮衣。甚堅好。

白越議

明李日華六硯齋筆記云。大食國貢白越議三段。白越議番布之最精者。

罩甲

國朝王應奎柳南續筆云。今人稱外套曰罩甲。罩甲之制。比甲則長。比披襖則短。創自明武宗。前朝士大夫亦有服之者。

按今吳中猶有馬甲之稱。當即由罩甲而得。

月白繡花褂

國朝禮親王嘯亭襍錄云。國初尚沿明制。套餐褂有用紅綠組繡者。先良親王。有月白繡花褂。先恭王猶及見之。今吉服用紺。素服用青。無他色矣。

按此知今之外褂。即明之罩甲也。

得勝褂

國朝禮親王嘯亭續錄云。燕居無著行衣者。自傅文忠征金川歸。喜其便捷。名得勝褂。今無論男女燕服皆著之矣。

便帽

國朝禮親王嘯亭續錄云。少時見士大夫燕居。皆冠便帽。其製如暖帽。而窄其簷。其上用紅片錦。或石青色。緣以卧雲。如葵花式。頂用紅絨結頂。後垂紅綬尺餘。無老少。皆冠之。惟老翁夏日畏早涼。用青緞縫劙。襯涼帽下。如今帽頭狀。初不以為燕服也。近十餘年。盛行帽頭蟠金線組繡其上。至有明珠寶石嵌者。如古弁製。頂用紅絨結項。稍異古耳。

按此兩種帽。今皆用之。但轉無其華美也。帽後垂紅綬。咸豐間猶有之。今則否。

浣中衣不敢懸空處

宋施德操北窗炙輶錄云。趙清獻公既致政歸。其清修益至。每浣中衣。不敢懸之空處。曰。恐觸汗神靈。乃挂於牀。使陰乾。推此。其有欺暗室事乎。

手帕子

後蜀何光遠鑑戒錄云。天復初。車駕走幸石門宮。人楊舞頭。原注失其名。進裛淚手帕子。奉宣加楚國夫人。

明宮人鞋

國朝禮親王昭璉嘯亭集錄云。西什庫中尚餘明宮人鞋數十箱。皆以珠寶飾之。其糜費若此。

茶香室三鈔卷二十五終